

दिनांक 16.10.2024
समय: 18.45 बजे
आकाशवाणी जयपुर-अजमेर
प्रादेशिक समाचार

- केंद्र सरकार रबी री साखां रा सरकारी मोल मांय बधोतरी कीनी-केंद्रीय कर्मचारियां अर पेंशन लेवण वाळां रा महंगाई भत्ता मांय तीन फीसदी री बधोतरी रो ऐलाण।
- राईजिंग राजस्थान इन्वेस्टमेंट समिट सारु न्यारा-न्यारा जिलां मांय इन्वेस्टर समिट राख्ही ज्यी-करीब 300 इकाइयां सागे 37 हजार करोड़ रुपया ऊं बत्ता मोल रा करार करी ज्या।
- मुख्य निर्वाचन अधिकारी नवीन महाजन वीडियो कान्फ्रेंस रे जरिये प्रदेश रा सात विधानसभा हलकां मांय व्हेवण वाळा उपचुनाव री तैयारियां रो जायजो लीनो।
- प्रदेश रा शेखावाटी हलका समेत कुछ इलाका मांय हल्की ठण्ड -सीकर मांय रात री बगत पारो 16 डिग्री सैल्सियस ऊं नीचे उतर्यो।

000

केंद्र सरकार आज विपणन सत्र 2025-26 सारु रबी री साखां रा सरकारी मोल मांय बधोतरी रो फैसलो कीनो। प्रधानमंत्री नरेन्द्र मोदी री सदारत मांय नई दिल्ली मांय व्ही केंद्रीय मंत्रिमंडल री मीटिंग मांय ओ फैसलो करी ज्यो। मीटिंग पाछे सूचना अर प्रसारण मंत्री अश्विनी वैष्णव खबरनवीसां ने मीटिंग मांय करी ज्या फैसला री जाणकारी दीनी। वे बतायो के रेपसीड अर सरसों री साखां मांय बत्ती ऊं बत्ती तीन सौ रुपया प्रति क्विंटल री बधोतरी रो फैसलो करी ज्यो। वैष्णव बतायो के मसूर री दाल मांय पौने तीन सौ रुपया प्रति क्विंटल री बधोतरी करीज्यी है। ई सागे ई चणा रो सरकारी मोल ई दो सौ दस रुपया प्रति क्विंटल अर गेहूं रो सरकारी मोल डोढ सौ रुपया प्रति क्विंटल बधायी ज्यो है। मंत्रिमंडल केंद्र सरकार रा कर्मचारियां अर पेंशन लेवण वाळां रा महंगाई भत्ता मांय तीन फीसदी री बधोतरी रो फैसलो ई कीनो। मंत्री वैष्णव बतायो के ई फैसला ऊं 49 लाख ऊं बत्ता कर्मचारियां अर 64 लाख ऊं बत्ता पेंशन लेवण वाळां ने फायदो मिलेला। राज्यसभा रा सदस्य घनश्याम तिवारी साखां री खरीदी रो सरकारी मोल बधावण समेत सरकार रा न्यारा-न्यारा फैसलां रो स्वागत कीनो है। वे आज एक बयान जारी कर र कह्यो के केंद्रीय मंत्रिमंडल कानी ऊं विपणन सत्र 2025-26 सारु रबी री साखां री खरीदी रा सरकारी मोल मांय बधोतरी रा फैसला ऊं किसानां री बेहतर आय तय करण अर रबी सीजन रे दौरान खास साखां री खेती ने बधावो मिलेला।

000

‘राईजिंग राजस्थान ग्लोबल इन्वेस्टमेंट समिट-2024’ रा तहत आज प्रदेश मांय ‘जिला स्तर माथे राईजिंग राजस्थान समिट रा कार्यक्रम राख्ही ज्या। आं मांय करीब 300 इकाइयां सागे 37 हजार करोड़ रुपया रा करार करी ज्या, ज्यां रे जरिए लगभग 39 हजार जणां ने नौकरी-धंधा रा मौका मिलेला। हनुमानगढ़ मांय राख्ही ज्या सम्मेलन मांय खाद्य अर नागरिक आपूर्ति मंत्री सुमित गोदारा री मौजूदगी मांय औद्योगिक संघां रा ओहदादार, वठे रा निवेशक, प्रवासी निवेशक, अहलकार अर उद्योग जगत री हस्तियां सिरकत कीनी। जिला स्तर री इन्वेस्टर मीट सारु हाल ताई 1447 करोड़ रुपया रा 91 प्रस्ताव मिल्या है।

आं निवेश प्रस्तावां ऊं 7 हजार ऊं बत्ता नौजवानां ने नौकरी-धंधा रा मौका मिल सकेला। सवाईमाधोपुर मांय राख्ही ज्या निवेशक सम्मेलन मांय जिला रा प्रभारी मंत्री गौतम कुमार दक निवेशकां ने सरकार री मदद रो भरोसो दिरायो। सम्मेलन मांय शिक्षा, स्वास्थ्य, खेती-बाड़ी अर बुनियादी ढांचा विकास समेत न्यारा-न्यारा हलकां मांय 1 हजार करोड़ रुपया ऊं बत्ती रकम रा 34 करार माथे सही करी ज्यी। आं रे जरिए 5 हजार ऊं बत्ता लोगां ने काम-धंधा रा मौका मिल

सकेला। बाड़मेर मांय राख्खी ज्यी ज़िला स्तर री इन्वेस्टमेंट समिट मांय प्रभारी मंत्री जोराराम कुमावत अर वाणिज्य अर उद्योग राज्य मंत्री के. के. विश्नोई ई सिरकत कीनी। ई मौके ज़िला रा खास उद्यमां, एमएसएमई अर हाथ रा कारीगरां कानी ऊं बणायी ज्या सामान री प्रदर्शनी लगायी ज्यी। जैसलमेर मांय राख्खी ज्यी जिला स्तर री राइजिंग राजस्थान इन्वेस्टर समिट मांय 76 औद्योगिक इकाईयां सागे 25 हजार करोड़ रुपया ऊं बत्ती रकम रा करार करी ज्या, जिण ऊं 15 हजार ऊं बत्ता लोगां ने नौकरी धंधा रा मौका मिलेला। धौलपुर मांय राख्खी ज्यी इन्वेस्टमेंट समिट मांय गृह राज्य मंत्री जवाहर सिंह बेदम री मौजूदगी मांय 31 निवेशकां सागे करीब 607 करोड़ रुपया रा करार करी ज्या। ई मौके उद्योग विभाग री ओर ऊं डॉक्युमेंट्री फिल्म रो दरसाव ई करी ज्यो। बांसवाड़ा मांय राख्खी ज्या कार्यक्रम मांय 52 संस्थानां सागे करार करी ज्या। आं रे जरिये करीब 8 हजार 920 करोड़ रुपया रो निवेश व्हेला, जिण ऊं 11 हजार 600 लोगां ने नौकरी—धंधा रा मौका मिलेला। झालावाड़ जिला मांय हाल ताई करार रा 35 प्रस्ताव मिल्या है, ज्यां ऊं 515 करोड़ रुपया ऊं बत्ती रकम रा निवेश आवेला अर नौकरी—धंधा रा 2 हजार ऊं बत्ता मौका मिलेला।

00000

शिक्षा अर पंचायती राज मंत्री मदन दिलावर आज अध्यापक बणबा री सिखावण सारू स्कूलां रो आवंटन कीनो। न्यारा—न्यारा बी.एड. कॉलेजां रा 65 हजार 868 जणा अर्जी दीनी ही, ज्यां मांय ऊं 65 हजार 661 जणां ने स्कूलां रो आवंटन कर दियो ज्यो। ज्यां ने स्कूलां रो आवंटन नी करी ज्यो है वां ने इंटर्नशिप पोर्टल माथे काल ऊं ओजू अर्जी देवणी व्हेला।

000

प्रदेश रा 7 विधानसभा हलकां मांय स्वतन्त्र, निष्पक्ष, पारदर्शी अर बिना डर उपचुनाव करावण सारू माइक्रो ऑब्जर्वर अर सेक्टर ऑफिसर लगाया जावेला। मुख्य निर्वाचन अधिकारी नवीन महाजन आज उपचुनाव वाळा हलकां रा अहलकारां सागे वीडियो कॉन्फ्रेंसिंग रे जरिये राख्खी ज्यी मीटिंग मांय ई बाबत हुकम दीना। मीटिंग मांय डूंगरपुर रा ज़िला निर्वाचन अधिकारी अंकित कुमार सिंह चौरासी विधानसभा हलका मांय व्हेवण वाळा उप चुनाव री तैयारियां रा बारा मांय प्रजेंटेशन पेश कीनो। सलूमबर रा जिला निर्वाचन अधिकारी अरविंद पोसवाल ई प्रजेंटेशन रे जरिये चुनाव आदर्श आचार संहिता री पालना समेत न्यारा—न्यारा मुद्दां रा बारा मांय जाणकारी दीनी। ई बीचे सलूमबर मांय स्वीप गतिविधियां रा तैत बी.एन. कन्या महाविद्यालय अर सांवरिया महाविद्यालय मांय “मैं भारत हूँ” गीत गवाई ज्यो अर विधानसभा उपचुनाव मांय वोट देवण बाबत विद्यार्थियां ने जरूरी जाणकारी दीरीजी।

000

प्रदेश रा शेखावाटी हलका समेत कुछ हलका मांय थोड़ी ठण्ड महसूस व्हेवण लागी है। बीती रात सीकर मांय साढे 15 डिग्री सैल्सियस न्यूनतम तापमान दर्ज करी ज्यो, ज्यीं कारण आं हलकां मांय रात अर संवारे री पोर हल्की ठंड लागण लागी है। माउंटआबू, करौली, संगरिया, बारां, धौलपुर, अलवर, अजमेर अर बांसवाड़ा मांय ई रात री बगत पारो 20 डिग्री सैल्सियस ऊं कम दर्ज करी ज्यो। घणखर ठोड़ा दिन री बगत पारो 35 डिग्री सैल्सियस रे आरे—सारे दर्ज कर्यो जा रह्यो है। मौसम केंद्र जयपुर आवता 2—3 दिन प्रदेश मांय मौसम साफ रेहवण अर तापमान मांय उतार—चढ़ाव रा आसार जताया है।

000

प्रदेश मांय आज शरद पूर्णिमा रे मौके खास धार्मिक कार्यक्रम राख्या जा रह्या है। ई मौके मिंदरां मांय भजन—कीर्तन अर धार्मिक अनुष्ठान रा कार्यक्रम राख्या जा रह्या है। आज मोड़ी रात मिंदरां मांय खीर रो परसाद बांट्यो जावेला। झालावाड़ जिला रा झालरापाटन री पवित्र चन्द्रभागा नदी मांय काती महीना रो पवित्र स्नान सारू व्हे ग्यो है, जो काती पुण्य ताई चालेला।

000

भीलवाड़ा मांय दीवाळी रे मौके जनता ने शुद्ध मिठाइयां मुहैया करावण सारू दुग्ध उत्पादक सहकारी संघ री ओर ऊं 22 अक्टूबर ऊं 23 ठोड़ां मिठाई वितरण केंद्र खोल्या जावेला। संघ रा प्रबंध संचालक विमल कुमार पाठक आ जाणकारी दीनी। वे बतायो के ई सागे ई डेयरी बूथ माथे ई डेयरी संघ कानी ऊं शुद्ध दूध ऊं बणायी ज्यी मावा री बर्फी, पेड़ा, बीकानेर रा रसगुल्ला, गुलाब जामुन अर अलवर रो प्रसिद्ध कलाकंद ई मुहैया करायो जावेला।

000

भीलवाड़ा रा सेठ मुरलीधर मानसिंहका राजकीय कन्या महाविद्यालय मांय आज टाबरियां ने खुद री हिफाजत री सिखावण देवण रो शिविर सुरू व्ह्यो। शिविर रा पहला दिन 25 टाबरियां सिरकत कीनी। शिविर मांय पुलिस री महिला कमांडो टाबरियां ने खुद री हिफाजत रा महत्त्व री जाणकारी दीनी अर गुर बताया। एक महीना ताई चालण वाळा ई शिविर मांय जिला रा न्यारा-न्यारा कॉलेजां री टाबरियां सिरकत कर सके है।

000

टोबेको फ्री यूथ कैंपेन 2.0 रा तहत आज बाड़मेर मांय चिकित्सा अर स्वास्थ्य विभाग री ओर ऊं जागरूकता रैली निकाळी ज्यी। मुख्य चिकित्सा अधिकारी डॉक्टर संजीव मित्तल इण ने हरी झण्डी बता र रवाना कीनी। रैली मांय आशा सहयोगिनियां, आंगनबाड़ी कार्यकर्ता अर नर्सिंग विद्यार्थी सिरकत कीनी।

000

बारां जिला री अंता पंचायत समिति मांय “सशक्त बारां, प्रगति को शक्ति” अभियान रा तैत आज शिविर लगायी ज्यो। शिविर मांय 216 दिव्यांग जन नाम मंडाया। ई मौके 127 दिव्यांग प्रमाण पत्र जारी करी ज्यो, 8 ट्राय साईकल दीरीजी अर 14 रोडवेज पास बणायी ज्यो। कैम्प मांय अंता रा विधायक कंवरलाल मीणा ई मौजूद रह्या।

000

कोटपूतली-बहरोड़ मांय पांच दिन री जिला स्तर री स्काउट गाइड रैली अर मिनी जम्बूरी चाल रही है। आज इण मांय वन अर पर्यावरण मंत्री संजय शर्मा ई सिरकत कीनी। वे बानसूर रा विधायक देवी सिंह सागे पौधा रोप र पर्यावरण बचावण रो संदेश दीनो।

000

भीलवाड़ा मांय महिला कर्मचारियां सारू लैंगिक उत्पीड़न जागरूकता रा बारा मांय जिला स्तर री कार्यशाला राखी ज्यी। कार्यशाला मांय महिलावां ने कार्यस्थल पर लैंगिक उत्पीड़न कानून 2013 री जाणकारी दीरीजी।

000